

समे – 12:25

<><><><><><>

PM Swearing-in Ceremony

राष्ट्रपति द्रौपदी मुर्मू होर मनोनीत प्रधानमंत्री नरेन्द्र मोदी ते उंदे मंत्रिमंडल दे सदस्ये गी अज्ज संजा सवा 7 बजे राष्ट्रपति भवन च औहद्वे ते राजदारी दी सगंध दोआंगन। राष्ट्रपति होरें नरेन्द्र मोदी होरें गी सरकार दे गठन लेई साददा दित्ता हा। एहदे शा पैहले जंदे शुक्रवारें मोदी होरें राष्ट्रपति हुंदे कन्नै मलाटी लाइयै सरकार दे गठन दा अपना दावा उंदे अगगे पेश कीता हा। बीजेपी दे अध्यक्ष जे.पी.नड्डा हुंदी अगुवाई च राष्ट्रीय जनतांत्रिक गठबंधन एनडीए दे इक डेलीगेशनै राष्ट्रपति हुंदे कन्नै मलाटी करियै उनें'गी नरेन्द्र मोदी होरें'गी बीजेपी संसदी दल दा नेता चुने जाने सरबंधी चिट्ठी सौंपी ही। एनडीए दे सैहयोगी दलें दे समर्थन आहली चिट्ठी बी राष्ट्रपति होरें'गी सौंपी गई ही। केई सारे गोआंढी मुखें दे नेताएं गी इस समारोह लेई साददा दित्ता गेआ ऐ। समारोह च भारत दे गोआंढी मुखें सने हिंद महासागर खित्ते दे नेता ते होर दुए मन्ने परमन्ने दे लोक शामिल होंगन।

<><><><><><>

Adm. Council Decisions

लेफ्टिनेंट गवर्नर मनोज सिन्हा हुंदी प्रधानता तैहत कल लग्गी दी प्रशासनिक काउंसल दी बैठका दरान बडगाम, अनंतनाग, शोपियां ते रियासी जिलें च औद्योगिक एस्टेटें दे विकास लेई 2 जहार 25 कनाल ते 3 मरले जिमीं मुंतकिल करने दी मंजूरी दित्ती गई ऐ। प्रशासनिक काउंसल नै किश्तवाड़ जिले दी नागसेनी तैहसील दे गलहार भाटा ग्रां च कीरू पनबिजली परियोजना लेई 1 जहार 750 कनाल 17 मरले जिमीं 40 ब'रें लेई पट्टे पर चनाह वैली पॉवर प्रोजेक्टें प्राइवेट लिमिटेड गी देने दा बी फैसला लैता ऐ। इक होर महत्वपूर्ण गैह तैहत प्रशासनिक काउंसल नै श्रीनगर दी टाटू ग्राउंड च 139 एकड़ शा मती जिमीं पर मनोरंजन पार्क विकसित करने लेई विशेष स्पेशल पर्पस व्हीकल लेई भारत सरकार गी प्रदेश सरकार दी सैहमति जताने दा बी फैसला कीता गेआ ऐ। इस पार्क दे राएं प्रदेश च सैलसफा गी खरा मता बढ़ावा थ्होग ते इस पैहलकदमी गी केन्द्र सरकार दे सैहयोग कन्नै तोड़ चाड़ेआ जाग। एहदे राएं राजस्व ते रोजगार च बी बाद्धा होग।

<><><><><><>

Div.Com Bahu Fort

जम्मू दे डिवीजनल कमीशनर रमेश कुमार होरें बाहू किले ते बागे बाहू च विकास रक्ख-रखाव ते इनें थाहरें गी होर मता शैल सनाखड़ा बनाने दे जारी कम्में दी समीक्षा करने लेई इक बैठक सददी। आकाशवाणी दे जम्मू संवाददाता नै जानकारी दित्ती ऐ जे डिवीजनल कमीशनर होरें स्मार्ट सिटी परियोजना तैहत बागेबाहू च जारी विकास कम्में दा जायजा लैता। उनें सरबंधत अजेंसिएं गी निर्देश दित्ता जे ओ कम्में दी रफतार च तेजी आनदे होई इनेंगी मित्थे गेदे समें दे अंदर अंदर मुकम्मल करने दा निर्देश दित्ता। उनें एसएसपी ट्रैफिक गी आखेआ जे गड्डियां खडेरने लेई पार्किंग दा पूरा ते सेही सेही इस्तेमाल करने दे उपाए पर जोर दित्ता। जम्मू नगर निगम दे कमीशनर होरें मीटिंगें च ओहदे आस्सेआ करोआए जा'रदे कम्में दा ब्यौरा पेश कीता जिंदे च सड़कै दा दर्जा बधाना, प्रवेश द्वार दा निर्माण, पार्किंग, दकानें बगैरा दे बारे च जानकारी शामिल ही।

<><><><><><>

Agar Jitto Mela

रियासी जिले च औंदी 21 जून थमां शुरू होने आले त्रऊं दिनें दे अघार जित्तो मेले गी बवस्था आले ढंगै सिर करोआने लेई बंदोबस्तें पर चर्चा लेई अतिरिक्त जिला विकास कमीशनर सुखदेव सिंह समेयाल हुंदी प्रधानता तैहत कल सरबंधत विभागें दे जिला अफसरें दी इक बैठक लाई गई। इस मौके पर सुरक्षा, साफ-सफाई, सेहत, ट्रैफिक प्रबंधन, अग्निशमन, आरजी शौचालयें दी बवस्था, पीने आले पानी, बिजली दी सप्लाई ते जरूरी चीजें-बस्तें दे भाएं बगैरा पर खास चर्चा कीती गई। अतिरिक्त जिला विकास कमीशनर होरें सब्बनें जिला अफसरें गी निर्देश दित्ता जे ओह बंदोबस्तें गी मुकदा रूप देने लेई आपू'चै तालमेल बनाइयै कम्म करन।

<><><><><><>

CII Anganwadi Centers

बच्चें गी शुरूआती शिक्षा देना जकीनी बनाने लेई संगठिम बाल विकास सेवा आईसीडीएस रामबन नै सीआईआई फाउंडेशन दे सैहयोग कन्नै रामबन जिले दी बनिहाल सब-डिवीजन च आंगनवाड़ी वर्करें गी टीचिंग लर्निंग किट भेंट कीते जेह्ड़े शुरूआती पढ़ाई च बच्चें गी पढ़ाने ते सिखाने च कम्म औंदे न। आकाशवाणी दे जम्मू संवाददाता दी रिपोर्ट मूजब एह विशेष किट मकामी माहोल मूजब ते बच्चें दिएं जरूरतें गी ध्यानै च रखदे होई तैआर कीते गेदे न। इंदे च एहदे खडोने ते सिखने पढ़ाने च कम्म औने आले उपकरण बी शामिल न। इनें किटें दी मदद कन्नै रामबन दे आंगनवाड़ी केन्द्रें च बच्चें गी बेहतर ते दिलचस्व ढंगै नै पढ़ाया जाई सकोग।

<><><><><><>

Women Farmers

महिला करसानें गी सशक्त बनाने ते स्व-रोजगार दे मौके च होर बाद्धा करने लेई कल तलाब तिल्लो जम्मू आले कृषि भवन च फुल्लें दी बवसायिक काश्त बारे इक ध्याड़े दे सिखलाई कार्यक्रम दा सरिस्ता कीता गेआ। आकाशवाणी दे जम्मू संवाददाता दी रिपोर्ट मूजब रियासी जिले थमां 20 महिला करसानें इस कार्यक्रम च हिस्सा लैता। मैहकमा राई-बाई जम्मू दे डरैक्टर अरविंदर सिंह रीन होरें महिला करसानें कन्नै गल्लबात कीती ते भविकख च नेय कार्यक्रमें दे आयोजन दे महत्वै पर लोह पाई।

<><><><><><>

Ayush –District Hospital

आयूष मंत्रालय दे निर्देशें मूजब किश्तवाड़ जिले च कल महिला सशक्तिकरण लेई योग विशे पर दऊं बड्डे योग कैपें दा आयोजन कीता गेआ। आकाशवाणी दे जम्मू संवाददाता मूजब इनें योग कार्यक्रमें दरान खरी मती गिनतरी च लोकें गी योग दे बक्ख-बक्ख आसनें ते प्राणायाम दे महत्व बारे जानकारी दित्ती गई।

<><><><><><>

T20 World Cup

मर्दे दे आईसीसी टी-20 क्रिकेट विश्व कप च अज्ज भारत अपने गुप ए दे दुए मैच च रिवायती हरीफ पाकिस्तान दा सामना करोग। न्यूयार्क दे नस्साउ अंतराश्ट्री क्रिकेट स्टेडियम च एह मैच रातीं 8 बजे थमां शुरु होग। कप्तान रोहित शर्मा दी अगुवाई आहली भारती टीम नै अपने विश्व कप अभियान दी शुरुआत आयरलैंड गी 8एं विकटें कन्नै हराइयै कीती ही जिसलै के पाकिस्तान गी अपने पैहले मैच च पैहली बारी वर्ल्ड कप खेड्ढा करदी अमरीका दी टीम दे हत्थें हार दा सामना करना पेई गेदा ऐ।

<><><><><><>